



*Senin, 23 Mei 2022*  
**Ogen: Maleaki 3:8-10**



*"Ujilah Aku"*



**A**di isungkun kam, uga nge persepuhendu sedekah enda, uga jababndu? Rutin nge kam mereken persepuhendu e? Kai nge tujunndu mereken persepuhendu ku Rumah Pertoton? (mari sijabab lebe emaka teruskenndu ngoge). Megati kita melala si lupa entahpe la rutin bas mereken persepuhenta. Kitab Maleaki 3:8-10 enda jadi kata persinget man banta ibas kita ngejapken perbahanen Dibata ras penampat Dibata bas pendahinta amin gia lit paksana ulih sinidat arah pendahinta e la bagi sura-surata.

Dibata nggo nikapken sada bagin pendahinta bas babo doni enda. Emaka, kai banci siban guna tetap kita ngataken bujur man baNa arah kai si nggo ibereken Dibata banta? Enda labo persoalen sidatken untung ntah pe ulih bas pendahinta, tapi enda persoalen uga kita ngejapken pendahin e arah kinitekenta man Dibata. Nina bas kitab Maleaki, kalak si la maba persepuhentu ras persembahen emaka ia nipu Dibata. Sebab, ibunikenna si jadi sekerajangen Dibata. Pendahin e Dibata si mada, arah Ia nari si lit bas kita e. Genduari, kai nari alasenta la mereken bagin Dibata e? labo perban kita mereken persepuhentu ntah pe persembahenta man Dibata kita pe jadi kekurangan. Untung rugi dahinta, susah senang geluhta kerina nggo isikapken Dibata dalanNa. Enda me sada bagin si menguji kinitekenta. Arah temata iajuk kita guna nggit muat bagin ngataken bujur i bas kerina siibereken Dibata man banta. "*Ujilah aku*", ngatakenca man banta nggo nge kita ngasup mulihken si jadi bagin Dibata e, labo bas sidat ulih keuntungan pendahinta, tapi bas kerugian ntah pe tupung la bagi sura-surata e ngasup denga kita muat bagin guna ngataken bujur man baNa.

Kinitekenta iuji, kejujurenta iuji, ketutusenta iuji, pengendesenta iuji. Mari sigejapken kerna si e kerina. Siendeskenlah sijadi bagin Dibata, ula merangap. Sebab, Ia banci erban kai pe guna kita.